

由庚堂集

由庚堂集卷之三十五

緡雲鄭汝璧邦章甫著

塞得

備兵榆林後出塞也軍旅少閒趺坐徵
心偶有所省取寸楮識之積而條析攜
以入關因名塞得云

本真不動動是緣境緣過卽休靈明不動動
是識境識過卽休至人若鏡絕四貫一淵乎

萬物之宗

喜事是外縛厭事是內縛兩病一痛知外之
無與于內迫而後應何喜之有知內之必通
于外應而不畱何厭之有

聖與天一賢與道謀上也不肖者徇物下愚
者喪已下也上焉者蕩蕩下焉者昏昏中人
兩役出悅紛華入悅名理故憧憧交戰戰勝
乃肥

非處處勘過件件做過莫辨孰爲正法非一
悟百了一了百捐莫知孰爲要道故博文以
盡百家之變約禮以會一真之源如有所立
立不易方過此以往未之或知矣

乾坤未判性命渾淪開闢以來便有許多交
錯父母未生神氣冥合離腹以來便有許多
情態天地無心雖交錯萬化而體常寂然人
則有心故情識日熾而用常紛擾返本還原

乃爲早復

從今更無別法只是一靈常醒萬念俱捐
沌沌穆穆如愚終日便見先天真我若一毫知
識未泯猶曰妙悟吾將誰欺

當無思之時而隱隱有思是名散亂當有思
之時而懵懵無思是名昏沉靈寂感通原不
若是

無事則曰太虛太虛一有相涉得失若驚羹羹

豆見色虛烏乎在以此日省驗靜于動庶不落空寂爾

一以貫之動與靜一寤與寐一窮與通一恒與變一生與死一一者何也靈明寂靜體本無二合則成體無與應感之紛拏散則成始無與形骸之幻結

造物限人以氣不限人以年氣有厚薄故生有久近年也者世之所號以紀日月者爾善

養氣者氣可續而長矧於已稟有不盡而暴
去者乎風燭易滅置室則永引年之術難謂
盡無

胷中長閒澹遇事每從容其天定也無事時
忽忽若有所掛有事時憧憧若無所歸根源
不淨強欲安帖難矣

清閒之味澹而無窮情慾之樂濃而易厭故
至人不以彼易此

樂天知命惟有天足樂故一切順受其正真
知命之不可易而聽之自然若無可自樂便
不免外重安所知命

古人見得定養得深放得下展得開故心地
寬平而事業光揭今或未然宜不古若

一處乍明它或茫然未可言徹一時乍妥它
或紛然未可言定所以然者根深習錮學力
未恒安能勝克猛省剛決一息尚存不容少

懈矣

識得破忍不過捕風影以何爲說得妙行不到墜天花而奚益

喜怒哀樂之未發謂之中此一句已挾二氏之竅所謂不思善不思惡是本來面目者也五行不到處父母未生前亦復如是

太初一靈因氣而運靜便是陰動便是陽動靜不息陰陽互根潛天潛地亘古亘今安有

一時休歇却無一毫扭捏識得此機便是純亦不已又何生死可說

神之運處都是氣氣之靈處便是神神氣何嘗相離離則死故猶龍氏曰載營魄抱一能無離乎又曰窈窈冥冥其中有精恍恍忽忽其中有物息念安身身心合一神氣相抱是謂長生久視之道

未有吾身時一靈何在方有吾身時一靈何

來及無吾身時一靈何去知此謂之知生知
死得此謂之不生不死

神氣之離也有二匡床而夢遊九州懸骸而
想馳萬古是神離氣也蹶趨而已不知視聽
而心不在是氣離神也惟知道者能一之
自家信得過人便信得過是真人品平時放
得下臨事就放得下是真學問

虛應者心紛著者意譬之水流者心而意則

波矣聖人從心而毋意流而不波

道無方體欲以一班之見而盡道故見愈拘
局而道愈遠學無止法欲以一時之言而盡
學故言愈扭捏而學愈支離

冥心洞息若存若亡神返氣回泰宇天光一
亦莫執萬亦勿忘常寂常應至大至剛真安
歇處無何有鄉朝聞夕可何用不臧

窮理極精儘力發揮說得的却又不是志氣

極銳儘力用功做得的却又不是轉入轉遠
極易極難雖欲從之末由也已吾見其進未
見其止

有覺無念常覺常應卽殊塗百慮但名正覺
亦名正念有息無睡時息時醒卽鼻酣體縱
但名善息亦名善睡

欲念沸時賁育比銳欲事行時飴飭比甘及
其意倦樂過苦生全無足快唯知妄歸無而

自止自消一味清真淡而不厭

從前的知解一筆都勾從今後勤求一息莫
放生死任它生死甘休要我甘休

建牙授鉞千騎擁呼至尊榮矣緣散裸寢兀
然一身前者烏有舉手運足五官紛馳至便
利矣氣盡形化朽然一丘前者烏有不勢而
尊不形而神彼以一時此則萬古彼以一隅
此則八埏是何物耶汝知之乎知則真覺不

知則大夢醉浪一生竟成何事

真玄還虛非煉軀殼真空妙有非墮荒漠真
儒盡性不離不著一以貫之三歸本覺忻厭
俱乖言思多錯當面蹉過何處摸索塗抹附
卷束之高閣紅日三竿醉醒睡足水綠山青
花開花落請問當人是苦是樂

身外名身後名名根斬斷天根見爲已利爲
兒利利心洗盡道心清

由庚堂集卷之三十六

緡雲鄭汝璧邦章甫著

睹記

世宗肅皇帝從言官夏言請嘉靖九年分祀
天地作圜丘方澤于南北郊隆慶二年內臣
李芳奏乞復合祀天地時太宗伯錢唐高文
端公坐堂堂皇正色諭諸司曰二郊 皇祖所
定安敢輕議且豈中貴得言耶爲疏稱周禮

載園丘方澤之制甚詳燎壇座次禮樂象舞之數各有別則知天地分祭在周已然矣我太祖初建園丘于鍾山之陽冬至祀天建方澤於鍾山之陰夏至祀地後因齋居偶感陰雨始改合祀之禮世宗特集廷議更定四郊一如洪武初年之制行之四十年神祇欣格芳氣人致一旦輕議上曰郊壇分祀旣係皇祖初創皇考議復仍遵行當是時

芳氣勢張甚文端折之遂沮訕凜然大臣風
節余時觀政禮部所親睹云

皇明列聖俱由東宮登大寶龍飛首出者惟
今上前 英廟耳余閱實錄 英廟長髮時
奉先殿有祭翰林院撰告文以進餘無它儀
心識之一旦御劄內閣 朕將長髮卿可傳
諭禮部擇日具儀來看余詣閣接劄閣老問
云何余曰昨歲 皇上加冠上公贊冠宗伯

掌禮百官稱賀嘉禮已成今第長髮祇內庭
有祭耳安所具儀閣老目攝余 上有特諭
何爲此言且奚據余曰禮官典禮唯國典是
遵 英廟時已有定儀今敢二三耶論久之
閣老改顏嘆曰執事言良是顧此劄乃中貴
欲侈其事爲乞恩地覬賜玉賜金不貲昨特
詣閣言須盛儀稱賀彼方耽耽子乃片言尼
之乎余曰禮臣守禮耳不知其它閣老云然

則作何置對余曰引英廟故事移翰林院
撰文而已遂白宗伯疏如余言中貴怏怏詣
閣責部臣違劄閣臣曰禮官言是有祖宗舊
典在何敢別議中貴云卽入必不允送票如
部議持不下閣臣進三揭乃允諸閣老謂余
曰以子執奏中貴失望大費余調劑然得省
妄費不至違祖制亦幸矣中貴乘間徼恩
非制類如是

吏部驗封司故有功臣底簿太宰楊襲毅公所紀也世封諸家襲爵公移得旨諸歲月具在焉同年李本寧嘗爲余言宜錄備採撫及余郎司封閱之信然惜未備也一日胡氏子龍者疏稱越國公胡大海後裔應襲東川侯吏科叅駁謂龍疏先後十數上矣果應襲不宜久閣不則覆寢耳柰何漫無可否耶時余初任詰之曰東川侯胡海子降襲越國公乃

胡大海也歿後追贈公非剖符者兩人安得
侂爲一舛胡乃爾此必有射利詒若者出余
素所錄功臣事蹟示之其人泣曰某居京師
家頗饒有某甲子言同姓稍寅緣可得勲爵
遂聽之自疏請營求費且不貲今四壁立矣
搶地大慟余爲覆寢因移文五府取功臣誥
券宗支作功臣封爵考世爵首載底簿公移
次宗支圖次傳除封若恩澤若佞幸並爲傳

附之卷端倣諸侯王年表敘代敘爵總爲八冊刻存驗封署中每五年仍續核增入焉夫今功臣開國不數家也餘皆靖難以後卽奪門猶有存者彼其子孫蟬聯尚有不悉祖宗封所自起者何論它人余在比部時見陽武侯嫡庶爭襲下所司勘問久不決姑以誥券令家長薛某收候予應襲者亡何某遂上疏稱誥券在臣手臣當襲凡十數年乃定它多

類是益信是書宜有輯矣

王官錮老梁園不得外轉功令無之楊文貞
由審理歷左相猶國初事 世廟時楊文襄
題議得旨王官不外擢非祖制以後一體敘
遷昭如日星矣藩寮一缺補數人自楊襄毅
始也時欲疏通選法王官有因無缺起送改
補者銓部題以不肖官劣陞王府原示抑汰
若復送它補安所得事任自今聽其需次遂

踵行之亦未顯言錮也吏道雜而多端今藉此爲通銓良法矣勢重自難反然審理以下可如今例若長史綜攝宗藩事陞入擢出宜一如僉事卽親藩無多員故易通耳強宗得彈壓可消意外名封一切弊竇宗伯移核可不謬禪益宗藩匪細也夫三年大計疵者尚得降調乃憑一二考詞卽錮之終身視幽典尤重且一歲六行過矣漸清入仕之途變而

通之可也

久任守令良法也而竟莫能行何也人情怯
難而便易畏勞而喜逸欲速而不可與持久
大抵然已煩難與簡易之地日月倍蓰難者
淹而易者速化卽持三事爲券人誰與我仕
路風波旦莫間耳虧一簣而喪九仞人有戒
心矣夫九州異宜非至難之地任何必久非
高賢大良任何必久人人而久魚貫薪積勢

又不行惟酌天下繁劇難治者若江南之蘇
松常江北之淮揚鳳浙之杭嘉紹諸郡遴才
望者寄之而主爵另爲籍始不輕畀得之爲
華久而績著加銜旌異視他地之序遷者先
一歲再久而績著內擢京卿視銓部臺省之
序遷者軼一等令中外曉然知此數賢者不
與諸臣齒安如山岳跂如麟皇人有不奮者
乎省得一二人焉卽風一省天下總得若而

人焉卽風天下其餘待以常調可也若邑令
滋多行取歲及不必久亦不能久矣雖然予
見其難焉任官在冢宰冢宰久而專乃能畢
用人之權而無二三今冢宰席不能溫矣我
躬不恤皇恤我後繼之者人各行意意各私
人其詎能成美而終事乎嘻難言矣

閣臣必出翰林此詞臣自爲政耳若爰立簡
自帝心夫安能尼之張文忠楊文襄諸公非

世廟所拔置乎相業亦何必減詞臣也近廷臣有與推而無特拜則仍詞臣爲政耳要惟練國政而克贊萬機又烏乎必詞臣必非詞臣也今制每科選吉士教習爲館閣儲材是矣然以新進少年而掄拔于一日之鈐槧安在其爲妙選也倘以行取內外官擇其文治兼優者試而進之豈無文采足潤色皇猷者乎矧其徵之政事也世廟時以擴充政務

爲名出翰林爲庶職此自有說卽如所稱與其練之于未練孰若取之已練耶爲天下得人者必不爲此拘拘矣

肅皇帝孝思罔極已追尊興帝皇考矣又祀之世廟已又入太廟當是時卽張文忠諸公亦不能止也往余以禮官陪祀廟中見獻帝居武宗上竊未安焉請之內閣仍祀世廟爲宜內閣謂議良是顧親則今上大父

也一旦未易言耳九廟代祧若次及孝宗
不容不議矣因志之

太廟四時享祀則太祖南向成祖以下
東西向歲暮大祫則祧廟出德懿熙仁
四祖與太祖南向列聖東西向設衣冠焉
然亦以時隆殺至世廟帝后冠服加華矣
皇上拜禱足所履處用布卽灌洗亦用布家
法示儉此其一端云

太廟東近門處十六王設主于低席祔祭焉
西則開靖功臣前御史徐文華言祖宗親盡
且祧何有于諸王竟不報靖難功臣位次舊
遂開國者自郭勛請進其祖武定侯英廷臣
爭之勛言劉基配享時羣臣以文臣無間言
臣祖英武臣故多議阻 世宗入其言特准
英配享又令敘爵誠意伯遂居末行恐靖難
諸公亦自不安耳議禮之朝必有折衷也

始封功臣歿公贈王侯贈公伯贈侯祖訓也
王文成已進贈新建侯矣乃劉文成尚仍伯
爵大是缺典余每言之以贈太師且止然須
一議請耳

暹羅國稱雄海島諸國多貢獻焉海界有萬
里沙東蠻牛國者沙外野種也隆慶元年求
婚暹羅國王拒之峻東蠻牛大恚統沙外諸
國兵由萬里沙入圍暹羅凡三年而城破王

自經死虜其世子及中朝所賜印以歸次子
攝國事世子屢書令請印報讐毋以我爲念
次子遣使隨通事揭元禮具金葉表文方物
入貢因請印焉揭通事者江西豐城人也隨
父居廣州幼時鬻于暹羅人性慧黠王聞而
用爲通事絕愛幸之因令與俱來余時在儀
部詰以請印何爲荅曰暹羅受貢數十國非
天朝印不得調兵耳 上受表物傳內閣給

印示柔遠興滅至意余白內閣印當予顧不知印文若何閣臣謂第鑄暹羅國王印予之可耳余謂國初受封未必卽稱王且篆文尺寸有一弗合不取信諸國彼將復請刻印銷印於國體非宜且其國所存公移舊印固在宜檄廣東撫臣令取舊文至循而與之便內閣然予言畱來使京師令一使歸取印文至則都統制使印也當時若以王印予之必返

矣荒服島夷正朔所不及而尺組乃制其軍
興命中國式靈遠哉揭通事道其國風俗甚
悉大都是佛地代出一僧稱國師王視朝必
在側有不度卽糾正之國人向背王以國師
爲著蔡云夷使將發揭通事白狀願居廣東
夷使忿其背恩請得與俱還余詰之通事泣
曰誠如夷使言顧中華人寧久居夷耶蓋來
時先以諸子及金寶諸物入舟夷使未之覺

耳今往必死余乃聽之通事又言暹羅大將
多以聖鍊裹身致命處卽干矢不能入聖鍊
者人腦骨也真定一兒有之業以八十金市
去蓋異物人不能識其國人識之夫所稱萬
里沙內外島夷若恒河沙卽暹羅已不知有
東蠻牛矣世人據目力所至爲窮際不猶執
一葉觀娑婆而指浮漚當全體者哉

黔國公沐朝弼守雲南驕橫不檢虐其部民

滇人怨之撫按諸臣先後陳劾朝廷每優
賞焉朝弼益恣縱淫刑多命又殺上所賜
閹人罪狀日著始命緹騎逮至京師下兵部
會法司議辟以聞時余任雲南司郎中請于
大司寇石首王公曰朝弼勲臣也在八議列
又所犯多革前事據所劾奏不盡析卽傳重
典必赦原獄詞非盛列惡狀萬里械世守重
臣賊觀聽卽周內而不可貸又未稱優勲臣

體盍加慎焉王公曰然吾固念之余曰奉旨
首兵部聽彼議獄可爾王公言之大司馬譚
公公曰是不難群諸吏之習法家者具獄詞
顧未諳國體詞殊謬俚譚公乃謂王公是獄
非若輩能辦須比部成之王公屬余具草畢
列臯惡而入詔赦令可原坐故殺閹者依律
合死請上裁不正言斬也草已具出示御
史大夫葛公公稱善顧曰夏閣臣言非一品

議貴耶而正云斬今何不然王公詰余余曰
非然也凡應議人止稱合死取裁不敢正言
者 祖宗所定名例律也 世廟怒夏公甚
詰責主者法官震恐不敢用律而徇 上意
今上以法付法官奈何舍 祖宗萬世法而
佐人主一時喜怒耶王公輟爾然意未釋亟
爲閣臣道之閣臣謂當時執法不堅迄今有
遺議宜從律遂如余所議以聞得旨朝弼合

死念兩王功姑貸之其安置南京夫此一議
狀耳尚不敢持倘雷霆震擊三尺能自主耶
噫難言矣

漕艘過淮不早河水汎則多壞艘飄米米不
及數則罪王者隆慶初運官漕卒坐司農叅
繫都官獄者五百餘人例徵本衛所官軍月
餉以償然人羈北獄誰爲徵者卽部檄日迫
促若罔聞也以故死者相屬余視福建司篆

而憐之亟白司寇具疏請南發其略言此數
百輦者遭洪河飄流失米非故侵漁也罪不
至死而死于獄有傷 皇上好生大德且禁
錮多年而米無升斗輸于國課何裨宜釋令
回南就撫按諸臣勒期以月支輸補公私兩
濟 上深然之於是諸官卒南發有日矣而
大司農相難謂在令凡南發者須京兆府押
遞今此數百人安能人人致之南且窶人不

殍于道卽亡去耳然且不可司寇舉以詰余
余曰業慮及此已爲策待之矣夫諸官卒皆
衛所漕艘中人也今運艘尚未回南卽以此
輩各歸本伍官收管令駕舟往可資口食且
不得逸於計便司寇稱善遂以五百人歸亡
何而餉亦完僉爲快焉先是溫州衛指揮花
卿昂藏七尺乃父錮獄不得育子泣懇余以
一掛誤遂絕先人汗馬功且爲若敖氏鬼奈

何言已大慟比釋歸生有子矣各衛官亦多以功名顯云

錦衣衛校尉卽古金吾緹騎也隸堂司者稱駕下得緝盜賊奸宄西司房鎮撫理詔獄每有盜白堂官註隻字捕卽捕詣理刑者鞠狀叅送法司擬罪諸被捕者備受慘毒輒誣伏卽至法司諸校尉目攝不敢吐一語第願速死而已理刑千戶馮昕者賊狠人也索大戶

伍俊輩十餘家財不得則以盜呈堂請捕得
允卽煨內賊罪坐劫財當上刑余睹其人皆
膏粱子安能爾心疑之甫訊人人飲泣唯請
死盖緹騎在門畏不敢白也余益疑之則緩
其獄廉得誣指狀乃檄攝諸校尉及兵馬司
番役對鞠於是馮旰大恚白堂官謂刑部郎
受金故縱賊反攝諸校尉校尉奉勅緝盜
詎刑部郎得攝耶時堂官爲餘姚孫公珏亦

恚詣左司寇畢公謂郎中年少輕縱賊擅攝
駕下人將疏聞畢公令余毋得與金吾競恐
不利于官余謝殺人媚金吾卽意外不敢避
言之大司寇王公奮起曰錦衣稱無天日今
果爾其先疏陳狀余曰疏必以聞第須堂鞠
果誣始可疏耳王公亟取諸人細鞠不謬卽
贓物出自捕者家番役亦吐伏促余具疏而
孫公者聞而廉知馮千戶妄也詣余邸舍再

拜云千丘罔我幾殺多命法司業訊明任釋
其罪惟無攝校尉全體面耳余亦肅容謝之
諸人遂白然金吾校時時伺余以無間乃已
後馮昕積臯坐重典云夫刑曹治獄稱難者
以叅發由厥衛也又鞠訊悉自兵馬指揮得
上下其手非盡心審讞鮮稱平者蓋余居比
部五六載日廩廩焉間有所平反多忤時而
得免于齟齬幸也夫人各持成心誰哉知非

而謝過者乃孫公度粵人遠矣

熙祖祖陵在泗州基運山 德祖 懿祖就

熙祖望祭焉 仁祖英陵改稱皇陵在中都

翊聖山今鳳陽無城恐傷龍脉也撫臣王公

宗沐請城鳳陽余時在儀部詢於脉未必有

傷但切隣妥靈之地城成萬一內庭有纖故

追疑將若何乃寢其議及余往來鳳陽平行

莽蕩豪雄崛產而無城守禦亦非完計徘徊

久之然恐後人以祖陵故竟未敢任斯役耳
朱家巷在句容山川鬱盤真毓祥之區亦以
久榛不敢請標建第識其處毋樵牧傷毀而
已帝王天生不歎藉靈山川然宋時吳景鸞
奉詔覓陵寢稱江之北河之南中有佳城宋
不信用爲我祖宗卜宅又天壽山蜿蜒百
里列聖攸居非乾坤効靈有是哉萬萬世
無疆之祚匪偶爾也

郡國輸內府錢物入中官收者不問物美惡
第索錢名鋪墊無之卽精不受也常州布大
戶王鼎等十餘人起運官布郭守文輔責令
精不奇羸一錢諸大戶訴畱布直作鋪墊不
聽入京戶部驗布精好倍于常運者承運庫
內官恚無墊錢題坐侵欺送法司擬永戌余
至署衆泣愬如前鞠驗果然余曰罪當貰汝
顧貂璫勿受奈何汝能辦鋪墊之半當脫汝

衆欣從余言得四百金余令吏詣中官云此輩已坐遣卽庾死獄中無墊金矣若聽余從末減可得金之半中官亦欣從余乃入墊金而移計部以布散軍士免入庫改永戍擬杖釋之內璫非外廷比郭守急公而幾陷多人故察隱微權時勢政不得膠柱耳

王祿者刑部江西司囚也會大決將戮之市時余初授江西司主事當監視祿向余大呼

曰司主爾能平反奈何令李英尚繫獄耶英
非辜王堂以老病死耳初鞠不言英殿再駁
兵馬指揮索英贖不得乃坐英傷堂致命手
筆增入草固在牘中余同床二十年每見英
顙天泣余亦潄潄下也亟宜生此囚余故不
應復大呼曰余頃刻且死死固宜英何罪且
余何所爲苦請英命要以活一人卽死瞑耳
余移席他向若不聞者然側耳聽之祿呼益

厲至死不絕余歸取牘閱之一如祿言遂白
司寇毛端簡公公異之令覆鞠信然卽釋英
英出獄余問王祿與若同禁否其人何似英
忿言祿兇狠小人嘗奪予食毆予受侮至不
可堪胡問若也余語之故英乃大慟余命左
右引英西市向祿被刑處祭而呼祿名謂吾
以若得生矣英叩頭如余言哭之市市中詫
焉夫祿一死囚耳臨死乃能爲人白冤狀人

之將死其言也善殆謂是耶李英繫獄三十年矣累訊讞無釋者獄情微暖可不盡心乎哉

江右解官王鴻巨猾也侵內府料銀數千金法司擬永戍繫都官獄追還官輒攀誣富室以償又私索其金寄遺妻子以囹圄爲壘斷焉劉龍者故內官家人也富而椎鴻稱官銀寄其家分費龍苦刑鞠誣服罄貲入官猶未

得釋也余視刑部福建司事睹龍慘憤異之
廉得狀遂釋龍盖家已空而累斃者二矣予
宦跡所至見奸宄借追贓爲奇貨告親識受
寄及指產索鬻者踵接也上人不察株連繩
批轉相擾逼爲吏作漁獵墮奸宄術中者寧
王鴻一人哉訪問軍徒貫滿卽可坐何必多
贓贓少可速遣配省紛釋累亦清刑之一事
也

國初宗人令掌宗人府事以親王爲之凡宗
人生三日藩王報聞下宗人府籍之五年請
名儀部移核有奏報乃予題無則寢不予後
因親王分封以駙馬都尉攝府事幕官司籍
吏得上下手萬曆甲戌余入儀制閱宗人府
公移有先查無奏報而今稱有者有昔稱有
而今報無者大都與儀部胥通爲姦利索宗
人金不貲貧宗切齒而莫誰何余草疏請大

宗伯題置欽依宗藩格眼冊每藩自爲籍每
宗人列五格一填始生奏報二請名三請封
四請婚五卒禮科抄王疏出宗人府者必過
儀部據奏報填入冊名封婚卒亦如之一覽
瞭然主事一人掌其籍宗人府不得如前索
金諸宗快焉許駙馬從誠爲幕吏所紿稱攷
祖制奏報隸宗人府儀部安得廢制立籍欲
疏爭詣閣臣道其事閣臣曰禮部置籍甚善

且抄仍下宗人府彼第籍記之何謂廢制殆
不可爭乃止迨余歷周魯諸藩宗人僉謝此
舉裨宗人不貽顧恐後不能守耳夫以天潢
支牒而苦索于胥徒安得不釐正倘久而循
行蠹其少清乎

宗人典例至飭惟王疏由鴻臚寺入御前而
諸王歲祿千萬每歲冊封止一行如親王萬
石費其半得早題入已厚矣各宗聽于齋奏

者持空疏來各爲奏至再至三覆請先後無
序故抄愈煩而事愈壅余條奏每季合一府
請名爲一疏請婚請封如之凡部覆以奏爲
序冬至則春覆先後必不參差仍爲三款合
例者卽題不合者寢未明者行查請一位則
荅一位名位必不遺漏每王府爲一籍刻定
時日疏抄至則填入仍書行止于牌示齎奏
者漏則稟究左右覆題畢移文王府通知行

之夕人視牌如著蔡宗人視覆期如金石吏胥無所上下手覺簡要而多暇矣

宗人惟諸王尊而弊最叢集蓋冊牒浩汗耳目不能遍則竄而滋蠹余按諸王宗支作同姓諸王表親郡王之世裔具在焉每報生子則刻其上凡襲世子長子卽備載得請年月印其一於公移之末令知之諸冊時置案頭不必閱玉牒而已瞭然在目矣今春卿首所

稱同姓諸王表者卽此蓋宗政一要領云

山東昌樂王府絕封入所頒冊印于禮部轉
繳印綬監差官苦索勒余收冊印卽發批令
去內監恚甚謂所繳冊印俱銅造非原給者
禮部輕收將具疏叅請時少宗伯汪遠峰公
署部事有愬色歸咎儀司余曰此自司中事
不敢累堂上然無慮也色稍解余稔知鑄印
止白金十之六題以銅和之取其堅也惟冊

乃銀作局造發給副使冊封局多襍以銅故
磨得紅色歷朝繳內庫所貯者皆然亟令吏
詣局言狀將叅局官請以故冊對磨如色同
卽內局侵公金耳安所逃臯局官聞而大懼
以得其情實也第云寬時日當自彌縫乃集
故常掌局者醵萬金于司禮爲解司禮持之
復倍加賄始覆請 上前謂局中相沿撓和
弊已久一旦難盡法究姑追賠銀三萬金事

遂已局官謝余汪公色乃懌謂余何善制中
貴也內臣譸張難與言第得其機竅當自折
耳

宗人年十五請封例也顧各藩頒有奏格令
遵行後乃爲利竇焉宗人多不知書任爲奏
奏時已故違格致駁查查一歲則遲一歲又
之日月寢積遂已踰期卽奏不予題余至署
閱此類甚衆爲疏言宗人應封王爵耳目難

盡誑今諸王祇以奏格誤行查耳乃日又徘徊屢奏屢閣夫請封是耶宜題不則寢耳毋令貧者受抑且爲奸利通將駁查諸王行巡按御史覈奏如無它卽予題御史奏言各王當封貧不能載請耳予集吏胥詰之封與否以例耶貧耶衆無以對乃盡予之封是歲視往日有加焉貧宗望出意外相與尸視余而不知已之格于寶也因題奏格有違錯坐長

史司承行者不罪諸宗據部冊題請遂爲例
宗人得免駁寢于格亦幸矣

宗藩分茅寓內情勢亦自不同國初沿邊開
藩自遼至肅類建維城今所存者大同代府
寧夏慶府平涼韓府甘肅肅府地遠土荒幾
同篋戾代屢生釁慶亦遭兵韓之繁促過于
肅矣中原秦爲庶長體貌素隆未嫻詩禮周
多龍種英英秀傑而繇衍獨邁諸藩維持不

易焉若蜀府無多宗素稱饒富益府無多滕
號樂善矣情殊勢異因地制宜在外撫處惟
人居中宗伯衡劑加之意而善爲調可也

今宗藩之所苦者祿也非爵也前朝王侯得
食邑輸賦鑄山煮海國家監之衣食縣官不
得有爲于其國故無尾大之患然樂安江右
亦蓄滯謀勢久族滋變異迭出固其所也論
者以無祿宗人宜弛禁出仕或齊編民周藩

近有行焉青衿旣廩一同博士弟子矣顧通
于無祿祇覓株守而莫採本支則尤宜變通
爾藩祿今從折鈔寢示抑裁若輔奉爵號類
空告身非朝廷所乏可無靳也苛之則貧宗
無告寬之則典例漸淪要在清其弊端示以
公制儀部日費精神縣官不致中格內外相
維仁義並用斯敦睦爲公之道已

今之撫填者握激揚之權實有師帥之責顧

采聽耳目未必盡真其所督過已入白簡受
者尚未知也無論呈誤卽欲改過自新何繇
焉余撫大東爲幅簡以所聞者付監司郡守
覈焉少年一旦釋鉛槧意氣加人刑或重而
識未堅定未免踰檢形跡自黠彼方詡詡不
虞上人知也上人亟密語之故未有不矍然
悔悟者卽以此報稱改圖便當舍其往矣如
係風聞或出中傷旣核之析卽報亡有且以

所繇告遂識而白焉彼且坦然含沙無自至
矣予往在比部見人語不可事尚有爲之白
者後乃羣然樂聽而喜談漸不如昔故今之
察吏耽耽令人不爲不善也甚詳而愛惜人
才昭雪誣讐令人之敢爲善也常未懇到盖
不敢舍已而爲人白耳夫不能舍已則有我
有我何以利人大要於已取之而已

朝廷講求利端時令臣工條理財之策卒未

有出桑孔之上者筭及舟車已入銖鎰而空
匱如故曰廣開納吏道雜而多端民益窘于
剝削無如何則竊嘆已耳理財不能出大學
生衆用寡爲疾用舒乃若迂遠難行何也古
者上儉下效今上下浮費風日以靡源不開
而流不節雖一二搏嗇無救也世態江河殆
不可反非明君恭儉百執事承風閭閻調節
難矣卽以金論金耗於箔餘器尚在民間今

書金字何限衣筴銷製何限一費不可復返
動稱乏金有由矣生財大道遠於事情一時
未易舉末流支吾厯目前而忘本實所謂末
之何者今之謂耶

屯政治田足兵足食良計然日墜而不可舉
卽專官稽覈設法鏤搜背飭一時而衆議紛
起了無實際何也天下事必利歸于下而上
薄取之下受其利各視爲己業黽勉圖之乃

可大而久九邊先年納粟中引鹽課少而鹽
利多人卽以身力作邊地無不開闢寧待上
催督而趨後以少舒加引增價鬻之內商支
鹽無畫一權要先而積本後內外無利邊民
不任力而地荒矣本處軍民已業尚艱于力
何能爲此故粟日困而鹽日壅雖日招徠無
益也江北開畝薊東治田專使責成旋亦告
罷蓋使者計效旦夕以本營利急于白圭旁

觀者有忌心受事者無壹志效未收目前而
人已議其後安能有成又隨地制宜不可著
意見濟寧諸處令人開水田賞甚厚而民爲
厲余撫東已之民大快焉蓋水田勞而燥地
逸東民食麥而督之種稻收少而必易于它
處民勞費何堪卽厚勸非所甘也欲求實利
在撫臣乂于其職率作興事道郡有司實心
爲之隨地隨時得寸則寸稍有濟爾